

მეორე მატჩი ბელგიაში

ლიეჟი. (ბელგია). 17 ნოემბერს თბილისის "დინამოს" ფეხბურთელებმა ჩაატარეს აქ თავიანთი მეორე მატჩი. ამჯერად მათს წინააღმდეგ თამაშობდა ადგილობრივი "სტანდარტი".

აღსანიშნავია, რომ ბელგიის ერთ-ერთი საუკეთესო გუნდი "სტანდარტი" ამჟამად ცუდ ფორმაში იმყოფება და გათამაშების ცხრილში 6 ქულით საკმაოდ დაბალი ადგილი უკავია. ეროვნული ჩემპიონატის IX ტურში "სტანდარტი" შეხვდა "განტუაზს" და წააგო მატჩი ანგარიშით 4:6, ხოლო თბილისელთა შეხვედრა "განტუაზთან", როგორც ცნობილია, დამთავრდა ფრედ – 3:3.

ამიტომ "დინამოსთან" შეხვედრისათვის "სტანდარტის" ხელმძღვანელობამ გააძლიერა თავისი შემადგენლობა სხვა კლუბების რამდენიმე ძლიერი მოთამაშით.

მატჩის პირველი ნახევარი დამთავრდა ბელგიელთა სასარგებლოდ – 1:0. მეორე ტაიმის დასაწყისში კალოევმა გაქვითა გოლი, მაგრამ მასპინძლებმა გაიტანეს მეორე ბურთი, რომელმაც გადაწყვიტა მატჩის ბედი მათ სასარგებლოდ – 2:1.

19 ნოემბერი, 1959 წ.